

ILUARSIISSUT**(Siunnersuummut ulloq 17. august 2012 ullulernerqarsimasumut taartaasoq)**

Naalackersuisut matumuuna Inatsisartut Suleriaasiat § 33, imm. 4 naapertorlugu aalajangiiffigisassatut siunnersuut una saqqummiuppaat.

Kalaallit Nunaata inuit innarluutillit pillugit Naalagaaffiit Peqatigiit Isumaqatigiissutaannut ilanngunnarluni kissaateqarneranik Kalaallit Nunaanni Namminersorlutik Oqartussat oqariartuutiginninnissaat pillugu Inatsisartut aalajangiiffigisassaattut siunnersuut.

(Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoq)

Saqqummiussissut

(Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoq)

Siullermeerneqarnera

Inuit innarluutillit pisinnaatitaaffii pillugit FN'p Isumaqatigiissutaannut Kalaallit Nunaata ilanngukkusunnera Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut Naalackersuisut sinnerlugit matumuuna saqqummiutissavara.

Inuit innarluutillit pillugit FN'p isumaqatigiissutaata siunertaraa qulakkiissallugu, inuit pisinnaatitaaffiinik kiffaangissuseqarnissamillu pisinnaatitaaffinnik pingaarnerusunik inuit innarluutillit tamakkiisumik iluaquteqarnissaat, kiisalu inuit innarluutillit naleqassusaannik ataqqinninnerup siuarsarneqarnissaa. Aammattaaq isumaqatigiissut aqutugalugu, inuit innarluutillit innuttaasut allat assigalugit pisinnaatitaaffeqartinneqarlutillu periarfissaqartinneqassapput. Isumaqatigiissutip imarai innuttaasutut politikkikkullu pisinnaatitaaffiit aamma aningaasaqarnikkut, inuttut atugarisatigut piorsarsimassutsikkullu pisinnaatitaaffiit.

Inunnut innarluutilinnut atugassarititaasut pitsanngorsarneqarnerat nunat ilaasortaataqartut ataasiakkaat suliniuteqarnerisigut pisassaaq. Suliassaqrifiit sorliit pitsanngorsaaffigineqassanersut nunat ilaasortaataqartut namminneq aalajangertassavaat.

Naalackersuisunit siunertarineqarpoq, innarluutillit pillugit suliaqarfiup iluani piorsaaneq pisortat inuussutissarsiuteqartullu aqussinnaasaannik ingerlanneqassasoq. Aalajangiiffigisassatut siunnersuut akuerineqarpat, Naalackersuisunit kissaatigineqarpoq, innarluutillit pillugit suliaqarfiup tamarmiisumik sukumiisumik misissorneqarnissaa – misissuineq taanna aallaavigalugu ukiut 5-10-t tulliuttut ingerlaneranni suliniut aallartinneqartussatut nalilerneqartoq pillugu iliussissatut pilersaarusiortoqassaaq. Aningaasartuutaasussanut apeqqutaavoq, iliussissatut pilersaarummi suliniutip sorliup aallartinneqarnissaa aalajangiunneqarnerisigut.

Naalackersuisunit kissaatigineqarpoq, inunnut innarluutilinnut atugassarititaasut pitsaanerulersinneqarnissaat. Naalackersuisut isumaqatigiissutigaat, inuit innarluutillit pillugit

FN'p isumaqatigiissutaanut ilanngunneq tassaasoq siunertamut eqqortumut alloriarneq. Isumaqatigiissummut ilanngunnerup takutissavaa, Kalaallit Nunaat nunaasoq inuit innarluutillit pisinnaatitaaffiinik ilumoorussisoq, innuttaasullu taakkua atugarisaannik pitsaanerulersitsinissamik kissaateqartoq.

Taamatut naatsumik oqaaseqarlunga siunnersuut Inatsisartuni suliassanngorlugu ingerlateqqippara.